

JESUCRISTO TARIKAPUWAN

WAJ JINA KAWSAY

Tukuy kawsayninchejpi imaymana yuyaykuna umanchejman jamun.

Wakin runakunaqa imaynatachus kawsakusqankuwan sonqo junt'asqa kanku, mana dakunkuchu ni imamanta. Chaywampis uj ñawi ch'irmiypi imapis kayta atin paykunata llakichinampaj. Wakinkunatarí ni imapi allin chu rin, mana tukukuyniyojta ñak'ariyllapi kawsakunku.

Kay libritopi rikuchisuyta munayku aswan allin kawsayta. Chayqa kashan Diospa qosqan kawasay Jesucristonejta.

Ari, chayqa waj jina kawsaytaj, imaraykuchus mana noqanchej runakunamantachu kashan chayqa.

Waj jinapuni kashan chay kawsayqa, imaraykuchus tukuy ima mosoj, noqanchejrayku Jesucristo cruzpi wañusqanrayku.

Waj jinapuni, imaraykuchus chay jinallamantamin Dioswan allimpi kayta atinchej.

Waj jinapuni, imaraykuchus chayraykulla atinchej yachayta imapajchus kay pachapi kawsayninchej kasqanta, chayraykutaj tukuy sonqo suyakuyta yachachiwanchej.

Ashkhas ninku cristiano kayta munasqankuta, jinapis mana munankuchu yachayta imaynachus cristiano kawsay kasqanta. Wakinkunatajrí munankupuni yachayta. Chayta yachaspataj kallpakunku chayman jina kawsakuyta. Chayta yachachisuyta munayku kay libritonejta; chaytajmari kashan cheqa kawsayqa. Chay jina kawsayta Dios munan qoyta tukuyman.

PITAJ KANI NOQA?

Qanqa ichapis qan kikiykita tapukunki: Noqari cheqamanta pipunitaj kani? nispa. Diospa Simi Nisqan nisunki: "Qanqa runa kanki, Diosman rijch'akoj ruwasqa kanki, nispa. Chayqa niyta munashan Dioswan allimpi kawsakunayki kasqanta. Kawasayniykeqa mana junt'asqachu, nitaj yachakunchu imapajchus kawsashasqayki, Dioswanchus mana allimpi kashanki chayqa. Manatajchus Dioswan allimpi kawsakushanki chayqa, mana cheqa kawsayniyojchu kashanki. Chayta yachachishan Diospa Simi nisqan.

DIOSPI MANA CREESPAQA SONQO JUNT'ASQALLACHU KASHANKI?

Ashkha runakuna Diospi mana creenku, nillataj Diospa Simi nisqantapis. Paykunaj yuyasqanku ajinapuni kasqanta creenku, chayraykutaj ninku Diospi mana creesqankuta. Diosqa mana kanchu, ninku; imapis kachunta kawsakunku. Jinapis, tukuy imapi allin risqanmanta mayta runaykachanku. Chay jinata kawsakoj runakunamanta Diospa Simi nisqan parlallantaj.

Salmo 73 parlashan chay jina runakunamanta. Sut'ita rikuchishan, chay jina runakunaqa kawsakushasqankuta Diosmanta karupi: May kasqankuta yuyakunku, tukuy imayoj kasqankumanta, mana dakunkuchu wañunankumantapis. Ima munasqankutapis tarillanku; chayraykutaj tukuymanta asikunku, mayta jatunchakunku. Janaj pachaj contranta parlanku.

Jinaqa kay Salmo yuyarichin imapichus paranqanku ajina runakuna chayta. Tukukuyninkoqa manchay phutiy kanqa. Salmo 73:18 nin: "Cheqamanta paykunataqa llust'anaman churanki; mana allin kajmantaj tanqaykunki. Uj ñawi ch'irmiypi pampachasqa rikhurinku. Manchachikoy paykunataqa tukuchin.

Qanqa ichapis yuyanki: Mana creenichu Diospi, mana paywan allillanta kawsakuyta atini, nispa. Chaywampis ima llakiypi rikhurispaqa yanapata paymanta mañakunki. Universidadpi yachaqakoj uj runa mayta jatunchakoj Diospi mana creej kasqanmanta; chaywampis mayta mañakoj kasqa examenta qosqampi allin rinampaj. Cheqamanta mana chaykamachu karqa Diospi chay mana creesqanqa. Ajina kanku ashkha runakuna, Bibliaj nisqanta mana creejkuna. Diosqa manapuni kanchu, nispa nirinku. Llakiyman urmaj jina kashaspataj Diosmanta yuyarikunku, mañakunkutaj usqhayllata.

Phutisqachu, mancharisqachu kashanki? Chaychu yuyayniykimanta mana chinkashan? Kawsayniyki yanqha manakaj kasqantachu reparashanki? Allin risunki chaypis, mana allinchu risunki chaypis, allin kawsayta mask'anallaykipuni kashan, yanapapis kashallanqapunitaj. Chay qhesachasqayki Diosqa mask'ashallasunkipuni.

DIOSQA MASK'ASHASUNKIPUNI

Mana qanchu Diosta mask'anke. Qanqa mana munankichu paywan allimpi kayta, Diostajrí mask'ashallasunkipuni. Payqa munampuni qanwan allimpi kayta. Diosqa munakusunki; chaytaqa Diospa Simi nisqampi nishan. Amapis creeychu Dios kasqanta, Diosqa maytapuni munshan tarisuyta paypata kanaykipaj.

Yachanayki tiyan kayta: Diosqa mana pitapis munajta mana munajtaqa mat'iykunchu paywan allimpi kanampaj. Imaynatachus uj qhari mana atinmanchu uj warmiwan munachikuyta munajta mana munajta, ajinataqa. Munanakoyqa purajmantapuni, icharí? Chay jina kawsayman chayanankupajqa iskayninku uy yuyayllaman chayananku tiyan. Dioswan noqanchej runakunawanqa, paypuni ñawpajta wajyawanchej pusawanchejtaj payman.

Maypachachus, imapis t'ojpishasunkiman jina, sonqoyki mana kakuyta atishanchu, manataj yachayta atishankichu imajtinchus ajina kashanki chayta; chayqa ajina,

imaraykuchus Diospa ruwasqan kasqaykirayku, paywan uj sonqolla kanaykipaj. Jinaqa chay sonqoyki mana samarenqachu Diosta uyarinaykikama.

PHIRISQAMANTAPIS ASWAN PHIRISQAPUNI

Qallariypi runaqa Diosman rijch'ayniyoj ruwasqa karqa juchamanta llimphu. Dioswan allimpi karqa, imapajchus ruwasqa karqa chaypaj jinapuni.

Runarí ruwasqa kasqa tukuy imata yachaqayta atinampaj jina; chaywampis manarajpuni junt'asqarajchu. Runaqa ruwasqa kasqa, tukuy kawsaynimpi ashkha imasta yachaqanampaj. Chantá Diosqa uj examenta ruwasqa paywan; Diospa Simi Nisqampi, Génesis 2:16,17 nishan: "Chaymantá Tata Diosqa kamacherqa runata: Huertapi tukuy nin kaj sach'amanta mikhullanki. Allin kajta mana allin kajta yachanamanta sach'aj poqoy nillanta amapuni mikhunkichu. Chay sach'aj poqoy nintachus mikhunki chayqa, wañunki, nispa."

(Ari, kunantaj yachasun imaynapichus Diosmanta t'aqasqa rikhrerqa chayta. Ñawisninchejpa tukuy rikusqanta, jinallataj mana rikusqantapis Dios ruwasharqa chaypacha, Janaj pachapi tukuy kaj chhikata ruwarqa. Chaytaqa yachanchej Diospa Simi nisqampi. Ruwarqa angelkunata; chaykunamanta ujnimpis sajra yuyay rikhrisqa. Chayrayku paytaqa janaj pachamanta Dios wijch'umorqa. Runatarí Diosqa ruwasqa Diosman rijch'akojta, mana juchayojta, llimphuta; runataj Dioswan allimpi karqa)

Runaqa ichapis chayta mana repararqachu, imaraykuchus mana mikhunanchu kasqanta. Ichapis yuyarqa allillan kananta imachus allin imatajchus mana allinchu kasqanta yachananqa. Chaypi yachakunan karqa Diospa kamachisqanta kasonqachus manachus chayta.

DIOSQA NISUNKICHU: ...?

Manachus juchaman runa mana urmananchu karqa chayqa, yachallanman karqa imachus allin imatajchus mana allinchu kasqanta mana juchaman urmaspalla, nitaj Diopa enemigonman tukunmanchu karqa. Jinaqa, allin imaspa enemigon Supay payta atiparqa.

Supay Satasqa Diospa ujnin angelnin, ichapis tukuy nin angelkunamantapis aswan jatun angelnin; jinapis juchaman urmarqa. Paytaqa may k'achata Dios ruwarqa. Uj p'unchaytaj Diosman sayaykuyta qallarera. Ajinata ari payqa Diospa enemigonman tukorqa. Payqa ni jayk'aj salvasqa kayta atenqachu.

Jesucristoqa nerqa: Nina larway wakichisqa kasqanta Supaypaj, payta qhatejkuna angelkunapajwan. Paykunaqa t'ukuna may chhika kanku. Mateo 25:41 nishan: Chay nina larway infierno nisqaqa wakichisqa kasqa mana runapi yuyaspachu. Sichus pipis jaqayman yaykun chayqa, mana Dios chayta munasqanraykuchu. Diosqa munan tukuy

runakuna salvasqa kananta, 2 Timoteo 2:4. Ninchej jina, Supayqa Dioswan churanakun. Qantapis Diosmanta karunchachisuyta mask'an. Runapaj imaynatachus salvakunankupaj Diospa wakichisqantapis phiriyta munan.

Kay pachapi runaqa mana ashkharajchu karqa, manachayqa iskaylla, uj qhariwan uj warmillawan kasharqanku. Uj p'unchay Edén huertapi chay warmi kajta uj Katari parlapayaykorqa. Ñawpajtaqa Evaj umanta muyuchiyta qallarera, imaraykuchus Evaqa Diospa kamachisqanta mana uyarisqachu, manachayqa qosampa simillanmanta yachasqa. Chaywampis qhari-warmi yacharqanku Diospa kamachisqanta: Chay ujnin kaj sach'aj poqoyninta amapuni mikhunkichejchu, nispa nisqanta. Chay katareqa ichapis chay sach'a patamanta parlaykorqa warmimanqa.

Génesis 3:1 nin: "Huertapi tukuynin sach'aspa poqoyninta ama mikhunkichej, nispachu nisunkichej? Nispa. Arí, ajinata Supayqa katorej siminneja chay Eva sutiyoj warmiman parlaykorqa; chaywampis mana Diospa kamachisqanta jinachu.

Kaypeqa sumajta unanchana kashan. Evamanqa ichapis rijch'asharqa Dios imatachá niyta munashasqanta; imaraykuchus kunankamaqa qosallanta uyarisqa Dioswan parlayta. Jinallapi katari parlapayaykun Diospis parlapayaykushanman jinata Evata ch'awkiyanampaj.

"Diosqa nisunkichejchu?" nispa tapurerqa (Génesis 3:1). Chayta uyariytawan Evaqa ichapis yuyashanman karqa katareqa (Supayqa) Diospa nisqantapuni nishasqanta.

Maypachachus chayta Satanás taporqa: "Diosqa nisunkichejchu, kay huertapi tukuynin sach'aspa poqoyninta ama mikhunkichejchu, nispa?" Mana reparayllata Evaj umanata muyuchisharqa Diospa kamachisqampuni ajina kasqanta yuyachispa. Supayqa ajinatapuni pillatapis ruwan Diospa Simi nisqampis kanman jinata parlaykurispa.

Diospa Simi Nisqan nin Supayqa llullapuni kasqanta. Jinapis Evaqa uyarerqa mana Diospa nisqan kikintachu, chayrayku manaraj imapi urmarqa juchaman Diospa kamachisqanta mana kasuspa, imaraykuchus chay sach'aj poqoyninta mikhukorqa. Jinaqa sumajta unanchana kashan. Pillapis Bibliyaj nisqanmanta waj imakunata kasuspa, runaqa Diosmanta astawan karunchakun. Chayqa mana kunallanchu, reparankichu chayta? Kay pachaj qallariyninpachapi chay pasarqa; chay jawataj tukuy imas phirisqa rikhrerqa. Chaymantapacha ajinallapuni kashan. Supayqa Evata pantacherqa chay sach'ata qhawachispa.

Génesis 3:6 nin: "Warmeqa sach'ata qhawarerqa, mikhunapaj jina moq'eyta, jinallataj chayta mikhuykuspá imatapis yachanapaj jina kasqanta. Ujnin poqoyninta p'itispataj, mikhuykorqa; qosanmampis jaywarqa, paypis mikhuykullarqataj." nispa. Arí, uj jatun llakiy chayamorqa, chayraykumari nishanchej tukuy ima phirisqa phirikoqa, nispa. Kay pachapi jucha rikhrerqa, chay jawataj rikhrillarqataj wañuy.

YAQHALLAPUNI

Yaqhalla salvasqa, jamuy kunan

Yaqhalla salvasqa kayta kunan atinki.
 Jesucristo wajyakusunki payman chimpanaykita.
 Angelkuna mayta munashanku Diosman kutirinaykita.
 Munakuwajkuna Diosmanta mañanku;
 Chinkasqa alma (runa) jap'ikuy perdonta.
 Yaqhalla salvasqa, kunanqa mana atikunñachu.
 Yaqhalla salvasqa, wajyasqaña kanki.
 Yaqhalla, ni imapaj valenchu chay "yaqhalla" ni imaman wakinchu
 Llakiy, jatun llakiy
 Yaqhalla salvasqa, chinkasqa kani.

PITAJ JESUCRISTORÍ?

Jesucristo nishan: "Noqaman jamuychej tukuy sayk'usqa kajkuna, llasa q'epiyokuna ima, noqataj samarichisqaykichej" nispa (Mateo 11:28).

JATUN LLASA Q'EPYUJ KANCHEJ

Kunampi runakuna may chhika kawsakunku phutisqa, sapayakuypi qonqasqa, ñit'isqa. Chaykunamanta wakinkunaqa mana yuyankuchu ajina kashasqankuta. Chaywampis ajinapuni, pichus Diospi unanchajqa jatun llasa q'epita apanan kashan.

Aswan llasaqa kashan sonqonchejpa yuyaynin Diospa qhawaynimpi may jina juchasapa kasqanchejta reparachiwanchej, juchachawanchejtaj. Diospa jatun kaynimpa k'anchaynimpeqa sut'i rikukun tukuy chay mana kasukoj kasqanchej, ch'awkiyayman qosqa kasqanchej, puraj uya kasqanchej, tukuy sajra imaspi yuyasqanchej ima. Jinaqa chay tukuymanta Diosman qona kashan cuentata uj p'unchay.

Arí, pikunachus tukuy chay imaspa llasaykusqan kawsakojqa yachan imayna phutiychus chay kasqanta.

Pikunatajchus ajina kawsayniyoj kashasqankuta reparakojkunari reparakullankutaj q'epeqa ancha llasapuni kasqanta. Chay jinapitaj waj imas rikhurin astawan ñat'unampaj: Onqoykuna, nanaykuna ima, kawsayninkoqa mana awantay atinaman tukun.

Chay jinachu kashan kawsayniyki? Ajina chayqa Jesucristo wajyashashasunki, "Noqa samarichisqayki" nispa. Qanqa ichapis yuyashawaj: Noqa ajina runa kashajtiypis Jesusqa jap'ikapuwanmanchu? Chayri imatataj ruwanay kashan Jesús samarichinawampajri? Nispa. Chaytajchus yuyashawaj: Noqata, ajina runatapis Jesusqa

jap'iwanchu? Nispa. Ajina kashanki chayqa unancharisunchej Jesucristo wajyashasqampi. Chaywampis tapukusun ujtawan:

PITAJ JESUCRISTORÍ?

Jesucristoqa chay wajyawasqanchejpi sut'ita rikuchiwanchej, chay jatun lllasa q'epinchejta pay apayta munashasqanta; paylla chayta atin ruwayta. Biblia sut'ita nin, Jesusqa cruzpi wañushaspa chay q'epita apasqanta (chay q'epitaj juchanchej). Juan Bautistapis nillantaj: "... kaymá Diospa corderon runaspa juchanta apaspa llimphuchajqa", nispa (Juan 1:29). Diospa Churin runaman tukorqa juchanchejta pampachanampaj, chaj juchanchej Diosmanta t'aqashawarqanchej. Diospa kamachisqanta mana junt'asqanchejrayku wañunanchej kasharqa. Jesucristorí cuentanchejpi wañorqa. Kamachisqanta mana junt'asqanchejmanta castigasqa kananchej kashajtinchej (jasut'isqa) Jesucristo castaigasqa karqa.

Profeta Isaias qhelqarqa: "... jucha q'episniykiwan llasaykuchiwarqanki, chay jina millay ruwasqasniykiwantaj sayk'uchiwarqanki. Noqarí, noqa kikiyta munakusqayrayku chay millay juchaykita pichani. Chay juchankitaqa qonqayman churasaj" nispa (Isaias 43:24,25).

Pitaj Jesucristorí? nispa tapukorqanchej. Qampis kay pachapi kaj runaswan kashanki. Chayrayku qanqa ninayki kashan: Jesucristoqa aswan lllasa q'epita q'epirikorqa, chay q'epeqa kashan tukuy kay pachapi runaspa juchan. Jinaqa qampatapis q'erikullarqataj. Chayrayku qampis chayta creenayki tiyan, chaypi sonqoykita churanayki tiyan, imaraykuchus Jesuspuni nin: "Ama imamantapis phutikuychejchu, astawampis Diosmanta mañakuspapaq imatachus munasqaykichejta mañakuychej, tukuy imamanta graciasqa qosallapuni. Chantá Diosqa chay mana unanchay atina sonqo tiyaykuyninta sonqoykichejman churanqa, chaytaj sonqoykichejta yuyayniykichejman waqaychanqa Cristo Jesuspi" nispa. (Filipenses 4:6-7).

IMATAJ SONQOTA TIYAYKUCHENQA?

Reparankiñachu Jesucristolla sonqota tiyaykuchej kasqanta? Arí, paylla tukuy juchanchejta pampachan. Jinaqa tukuy juchaymanta perdonasqa kani; manañataj juchachasqachu kani. Manaña iskayrayanichu Diospa wawanñapuni kasqaymanta. Kunanqa ima llakiypi kashaspapis mana llakikusajñachu, imaraykuchus Jesús noqamanta parlarenqa.

Maypachachus Jesucristo wajyawanchej: Jamuychej noqaman, noqataj samarichisqaykichej nin chayqa, mana yanqhallaapajchu. Sitajchus qan yuyawaj noqatapis nishawanmanchu nispa chayqa, uyariy imatachus Jesucristo nillasqantataj: "Noqamin chay kawsachej t'anta kani; noqaman jamojqa mana jayk'ajpis yarqhachikonqachu, noqapi creejtaj ni jayk'aj ch'akichikonqachu" nispa (Juan 6:35).

Jesucristoqa chaywan nishan: “payman jamuy” “paypi creey”, nisqanqa kkillan kasqanta pipis paypi sonqonta churasqarayku payman jamun, paypi creen. Arí, sichus Jesucristomanta imatapis uyarinki, paymanta ñawirinki imatapis, paymanta takinki, paypi creejkunawan qotuchakunki, yupaychanki chayqa, astawan, astawan Jesucristopi sonqoykita churanki. Salmo 37:40 aswan sut’ita chaymanta yachachin. Chaypi nishan: “Tata Diostaj mana allin kajmanta llusp’iyta yanapan. Sajra runasmanta ayqechispa, chay cheqan runasta salvan, imaraykuchus paypi pakakuyta mask’arqanku” nispa.

Uj yarawi nin:

Chay jatun munakuynimpi salvarqa

Chay khuyakuynimpi chayta qon.

T’ukuna laqha chinkay wayq’o runakunapaj

Chayninta Dios chimparqa cruzpi.

Chay jina khuyayta jap’ikorqani

mana chaypaj jina kashajtiy.

Tukuy juchaymanta perdonta jap’ini.

Llakisqa almay kacharisqa karqa,

Cristo Jesús rantivasqanrayku

SALVASQA KAYQA CHEQAPUNI

“Creepaqa yachanchej imapichus suyakushanchej, chayta jap’inanchejtspuni”
(Hebreos 11:1).

MANA AJINATA YUYASQANCHEJRAYKULLACHU

Hebreos 3:14 nin: “Cristowan khuska herenciayoj kananchejpaj churasqa kanchej sichus atienekusqanchejpi (sonqochejta churasqanchejpi) qallariymanta tukukuykama sinch’ita sayasunchej chayqa”, nispa. Noqancheqa Dioswan allimpi kashasqanchejta mask’anaman yachasqa kanchej, Bibliapis chayta nishanman jina. “Creepaqa yuyanchej jap’inanchejtapuni nisqanrayku, imaraykuchus nishallantaj ja’inanchejtapuni, nisqanrayku. Tukuy sonqo ajinata yuyasqanchejrayku ashkha creyentekuna pawisqa rikhurinku, chayta ukhunkupi mana tarispa. Phutikuyta qallarinku mana salvasqachu kasqankuta yuyaspa.

Chantá imaynatataj yachasanman salvasqapuni kasqanchejta? Chayta yachanapaj qhawasunchej Bibliapi imaynachus karqa wakin runakunawan chayta. Chaywampis ñawpajtaqa tapukusun kaytaraj:

IMAYNATATAJ IMAMANTAPIS SEGURO KASUNMAN?

Uqhunchejpi chayta mask'aspaqa mana seguro kasunmanchu. Sichus pipis nisunkiman imachus kusionqata ruwasunanta chayqa, usqhayllata payta tapuwaj: Imaynapitaj chayta yachanki? Pitaj chayta nisorqa?, nispa. Qan yuyasqaykimanta jawa waj pruebasta tarispa seguroqa kawaj, icharí? Pruebas kajtimpuni seguroqa imapis. Yuyaynillanchejpi imapis kashan chayqa mana imapis seguroqa kanmanchu. Sapa p'unchay imachus ruwasqanchejwan ajina chayqa, salvasqa kayninchejpi sumajta unanchanaqa aswanraj kashan.

Cristiano kasqayta yuyasqayqa imapitaj yanapawanman? Diospa wawan kasqayqa imapajtaj allin noqapaj? Ashkhaspa yuyaynimpichaylla, chaywampis ni jayk'aj cheqamantaqa cristianochu kanki. Ajina kanapis mana chaykama yanqhallaachu. Ashkha runakuna yuyanku cristiano kasqankuta, chayraykutaj yuyakunku Diospa wawampuni kanqankuta; jinapis, ni jayk'aj cheqamanta cristianochu kanku. Chaywampis, cheqamantapuni salvasqa kasqankuta kawsayninkupi mana tarisqankupis mana chaykama yanqhallaachu.

Chaywampis, sumaj ruwasqa wasej simienton jina Diospi creesqanchejqa. Paypi atienekusqallanchej (sonqonchejta churasqallanchej) salvasqa kasqanchejmanta seguro kayta qowanchej. Kunanqa chayta sut'inchawasun Biblia.

CHEQA CREYENTES KAJKUNA

Hebreosman qhelqasqa cartapi, capítulo 11 niwanchej ashkha runakuna salvasqa kasqankumanta mana iskayrayasqankuta. Creyente kasqankurayku wañuchisqa kaytapis mana manchachikorqankuchu, ni supayta, nitaj nina larwan infiernota, nillataj kay sajra mundotapis. Cristiano kasqankumanta ni ima paykunata kuyucherqachu: Ni qhatiykachasqa kay, ni imankuta chinkachikusqanku. Sinch'ita sayarqanku Diospi creesqankupi.

Dioswan allimpi karqanku, imaraykuchus salvaqa karqanku. Seguros karqanku wiñay kawsayniyoj kasqankumanta. Cheqa creyentesqa mana iskarayankuchu chaymanta.

IMAYNAPITAJ SEGUROPUNI KANKUMAN?

Hebreos capítulo 11 nisqanman jiana, Diospi creejkunaqa imaynapitaj seguropuni karqanku salvasqa kasqankumantaqa? Diospa Simi Nisqan chaymanqa kutichiwanchej: "Diospa nisqampi creespallapuni wañuporqanku, Diospa chay qonan

kasqanta manaraj jap'ishaspa. Karullamanta chay imasta rikorqanku ..." (v. 13). nishan chaypi.

Chay capítulo tukukuynimpi 11:39-40 nin: "Tukuy chaykunaqa creesqankurayku Diospa ñawpaqempi allin runaspaj rejsichikorqanku. Chaywampis Diospa qosaj nisqata mana jap'erqankuchu. Diosqa aswan allin imasta noqanchejpaj wakicherqa, noqanchejwan khuska paykunapis allin kaypi junt'asqa kanankupaj", nispa (He. 11:39-40). Noqanchejqa rikunchej Diospa nisqan junt'akusqanta, paykunari mana rikorqankuchu. Chaywampis paykunaqa mana iskayrayarqankuchu imatachus suyakusqankumanta mana rikushaspapis. Chayrayku paykunamanta qhelqasqa kashan, noqanchej paykunamanta yachaqakunanchejpaj. Paykuna jina Diospi creesqanchej sinch'i kanampaj.

Ari, chayrayku qampis, noqapis kunanmantapacha ama iskayrayasunchu chaymanta. Jinaqa sinch'ita sayasunchej kay creesqanchejpi, imapis kachun.

Ajinamin kashan seguro kayqa. Ichapis pipis imata nisonqanku chaymanta iskarayachisuyta munaspa. Chaywampis qanqa Diospa Simi Nisqata creellaypuni wañupunaykikama; chantá janaj pachapi wasiykiman ripunki Salvasojniykiwan khuska tiyapunaykipaj, Dios Tatapis jap'ikapusunki.

Jinallataj kunampi noqanchejpajpis kikillantaj: Manaraj, ni qan ni noqa mana rikunchejrajchu Diosqa juicio p'unchaypi salvawasqanchejta chay jatun castigomanta; nillataj wañupuspapis aswan allimpi Jesucristowan kanatapis. Chaywampis atinchej kunampipacha seguro kayta, jinataj atinchej sinch'ita sayayta creesqanchejpi imapis kachun.

IMAYNAPITAJ SEGUROPUNI PIPIS KASUNMAN

Creesqanchejpi seguro kanaqa mana yachakunchu tukuy kawsayninchejpi imachus pasawasqanchejpeqa. Cristianoqa kawsaynimpi niraj imapis pasashajtin, seguroñapuni Bibliaj nisqanta creesqampeqa.

IMAYNAPIPUNITAJ CHAYMANTA SEGURO KASUNMAN?

Chay jinamin kashan Jesucristo creesqanchejqa. Pikunachus mana creenkuchu astawampis churakuwanchej chaypis, imaymana sajrata nishawajtinchejpis atinchej paykunaman sayaykuyta. Ari, Diospeqa sinch'ita sonqonchejta charanallapuni, wañuy chayamuwajtinchejpis janaj pachapi wasinchejman ripusun Salvawajninchejwan tiyakamunapaj wiñaypaj, ajinata chhika munakoj Diosqa jap'ikapuwasun.

Chayta sut'ita umanchejpi jap'inapajqa yuyayninchejman apamusun Abrahampa kawsayninta: Hebreos 11:8 nishan: "Creesqanrayku Abrahampis wajyasqa kaspas Diosta kasorqa; hereciapaj jap'inan jallp'aman llojserqa mana yachaspalla maymanchus rishasqanta", nispa. Ima ratopitaj Abrahamqa chay herenciata jap'inanmanta seguro

karqa? Chay herencia jallp'a maypichus kasharqa, chayman chayaspachu? Chayrí wasinmanta pirishaspañachu? Ima ratopitaj Abrahamqa chay herenciata jap'inanmanta seguro karqa? Ima ratopitaj Abrahamqa paya warmin Sarawan paywan wawayoj kanankumanta seguro karqa? Chay wawan paqarejtinchu (nacejtinchu)? Mana, manachayqa aswan ñawpajtaña. Cheqamanta Abrahamqa seguropuni karqa, Sara warmin chay jina paya kanankama mana wawan kashatimpis, Dios payman nisqanrayku wawayoj kananta. Ari, chaypi yachanchej Abrahamqa seguropuni kasqanta creesqampi. Diospa nisqanta pipis creen chayqa seguropuni kashan junt'akunamanta, imaraykuchus Dios ajinata nin.

Diospa Simi Nisqan astawan chaymanta sut'inchawanchej. Biblia niwanchej, Abrahampa warmin Saraqa mana wijsallikuyta atinampaj jinachu kasqanta. Jinapis payqa wawayoj karqa. Hebreos 11:11 nin: "Sarapis mana wijsallikuyta atej karqa, chantá payañataj. Chaywampis creesqanrayku kallpata jap'erqa wawayoj kanapaj, imaraykuchus payqa creerqa, Dios imatachus qonanta nerqa, chayta junt'ananta".

Kaypi rikunchej imaynachus creesqanchejmanta seguro kana kasqanta. Diospa Simi Nisqanqa junt'akojpuni kasqanrayku. Dios imatapis nin chayqa ajinapuni, junt'akumpunitaj. Chayraykuy imapis kachun, Diospa Simi nisqampi sonqonchejta churana. (confiar).

Ima simipichus Biblia qallariypi qhelqasqa karqa, chaypeqa wasi cimientu jina cheqapuni kasqanta churasqa kashan: Kusikuyninchejpaj wiñaypaj salvasqa kasqanchej. Ñawpa Testamentopi chay imasqa manaraj junt'akorqachu. Chaywampis Diospa nisqasnenqa junt'akorqapuni, jinallataj noqanchejpajpis imata nisqampis junt'akullanqataj.

Chay wasi cimientu jina, noqanchejpajqa kashan: Diospa khuyaynin mana chaypaj jina kashajtinchej (Gracia de Dios) Dios qowasqanchej Jesucristopi. Dios khuyawarqanchej salvanawanchejpaj Jesucristopi manaraj kay pacha ruwasqa kashajtinña. Dios munarqa chaypachaña salvayta noqanchejta. Diospa Churin Jesusqa runaman tukorqa cruzpi wañushaspa jawar jich'asqanwan llimphuchanawanchejpaj juchasninchejmanta. Chaypi sonqonchejta churasun tukuy imamanta astawan.

Ari, ninchej jina, chaymin kashan chay wasi cimientu jina sumaj sayachisqa imapichus salvasqa kasqanchejqa. Noqanchej Jesuspi creejkunapajqa yachanchej, chayqa ajinapuni kasqanta, manataj cuentollachu chaymanta iskayrayanapaj jina.

Dios qowanchej: Qhasilla k'acha yanapayninta Jesucristopi mana chaypaj jina kashajtinchej. Chaymantaqa mana iskayrayananchejchu tiyan. Chaymanta jawaqa mana waj imaspichu creena kashan salvasqa kasqanchejmanta seguro kanapajqa, imaraykuchus salvasqa kasqanchejqa Diospa khuyayninraykulla mana chaypaj jina kashajtinchejpis. Chaypi sonqonchejta churananchej tiyan, chaytari Jesucristo noqanchejpaj tarerqa.

Ujtawampis nillasumpuni: Wasipaj sumaj cimientu jina salvasqa kasqanchejmanta creesqanchejqa kanan tiyan. Jesucristopi creejkunaqa yachanchej salvasqapuni kasqanchejmanta suyakuyninchejqa mana cuentollachu, manachayqa cheqapuni.

Dios qowanchej chay qhasilla k'acha yanayninya Jesucristopi. Chaypi sononchejta churana. Diosqa mana chamanta jawaqa imapipis sonqonchejta churanallanchejtataj. Kawasayninchejpi may jina sumaj imas kashasqaqa rikhurin Diospa qhasilla k'acha yanapayninraykulla. Ari, sonqonchejta churasun Diospa qhasilla k'acha yanaynillampi, imaraykuchus ninchejña Jesucristollapi Salvasqaqa kanchej, payllapi kashan Diospa qhasilla k'acha yanapayninqa.

CHAYTA TERINCHEJ TUKUY SONQO CREESPA JESUSPI, SIMI NISQAMPIWAN

Jesucristopi salvasqa kasqanchejmanta seguro kasqanchejqa kikillantaj kashan Jesucristopi creesqanchejpis. Diospa Simi nisqanqa niwanchej Jesucristo salvawajninchej sonqonchejpi rikhurichin chay creeyta. Jesucristo niwanchej juchanchejmanta perdonta wiñay kawsaytawan qowasqanchejmantaqa Diospa Simi Nisqan willawanchej. Chayta Dios nin chayqa, ajinapuni kashan, icharí? Chaywampis kunanqa mana rikunchejchu ñawisninchejwan, manachayqa creenallanchejpuni kashan tukuy sonqo imapis kachun.

Kunanqa yachanchejña salvasqa kasqanchejmanta seguro kanapaj waj imaspai mask'ayqa mana allinchu kasqanta, imaraykuchus salvasqa kayninchejqa mana noqanchejmantachu kasqanta, manachayqa Diosmanta. Chayraykutaj profeta Isaiasnejta Dios niwanchej: "Noqaman jamuychej salvasqa kanaykichejpaj tukuy kay pachapi tiyakojkuna. Noqamin Diosqa kani manataj waj kanchu" nispa (Isaías 45:22). Chantá Jesuspis Tomasman nillarqataj: "Dedoykita kayman churay, makisniytataj qhawariy; makiykita apamuy kay wajtanniya llankhaykuy. Ama iskayrayaychu, astawanqa creey, nispa." (Juan 20:27)

JESUCRISTO TARIKAPUWAN

Knut Pedersen sutiyoj runaqa tukuy kawsaynimpi Diosmanta parlallajpuni. Tawa watata misioneromanta tukuynejman rispallapuni, Diospa Simi Nisqanmanta yachachimuspá, jinallataj yachayta qospa Noruega suyupi Misión de Sunnfjord nisqamanta. 1978 watamanatapacha chayta ruwaspataj, Agder nisqa jap'iypi Mision Luterana Noruegamanta yachayta qospa ima. Chaymanta ñawpajtataj Knutqa uj churu Flekkroy churuman rej barcopi ujnin miembro jina, Diosmanta parlaspa karqa. Chay churuman mama qochaj uranta uj tunelta ruwakusqanmantapacha, Knutqa chay churupi tiyakapoj ripoqa ayllunwan khuska. Uyarinachej paypa parlasqanta...

IMAYNATATAJ QANTA JESUCRISTO TARIKAPUSORQA?

“May chhika unay manaraj kay pacha ruwasqa kashajtin, noqaqa Diospa yuyaynimpí kasharqani, noqapaj imatachus pay wakicherqa, chaypi kasharqaniña, Efesios 1:4 nisqanman jina. Mayqempa sonqonman Diosqa churarqaña noqarayku Diosmanta mañapunawampaj manaraj kay pachapi paqarishajtiy. Aswan ñaupajmantaj, chay noqarayku Diosmanta mañajkunaqa Diospa Simi Nisqanman qayllachiwarqanku. Jinataj Diosqa noqa wawallaraj kashanaykamaqa qayllaypi kasharqa.

Wayna kashajteyqa, Flekkeroy llajtapi kaj iglesiapi Diosta yupaychaj rej kani. Astawampis chay iglesiapi waynaswan khuska imachus ruwanapi ruwaysej kani. Reparayniymantaqa tukuy imapis chaypeqa allillan karqa. Chaywampis Diospa Simi Nisqan sonqoypa yuyaynimpí juchayojta rikhurichishawarqa; yuyayniypeqa chaylla aswan kasharqa. Ukhuypeqa sinch’i churanaku jina kasharqa Diospi yuyasqay noqaj yuyaychakusqaytaj. Ni imanakuyta atishajtiy Juchay atipawarqa, iglesiamantataj karunchakorqani. Jinallapi yuyayniyman jamorqa ashkha kutispiña ujta uyarisqay:” ¡Jesucristomanta mañakuy yanapata, pay yanapasonqa (salvasonqa) nispa niwasqan... Noqallanchejmantataqa mana atisunchu cristiano jina kawsaytaqa.!” Arí, mañakorqani; chantapis mashkha kutita waqaspa. Ni chaywampis sonqoy tiyaykorqachu. Chinkasqallapuni kashasqayta reparakorqani. Chaypiwanqa astawanraj phutikorqani: Imaynachus karqani, ajinallapuni kasharqani, astawampis ima juchata ruwaspapis manaña sonqoyta nanachikorqanichu. Chaymantataj, chay kutipeqa unay watas iglesiapi uj creyentewan parlaj rerqani. Chantá imaynachus kashasqayta, chay tukuy juchasniyta payman willakorqani.

SONQO TIYAYKUSQA KAYMAN PUSAJ

Mana yuyarikuniñachu imastachus parlasqaykuta; jinapis chay kutipi yacharqani may sumaj imata. Ripushajtiyña chay hermanoqa uj librota qowarqa, “Sonqo tiyaykusqa kayman pusaj” nisqa sutiyoj karqa chay libroqa. Chay librori qhelqasqa kasqa Suecia suyumanta kaj Carl Olof Roseniuspata. Sapa kuti ñawirikoq kani chay librota, astawanqa domingo p’unchaypi chawpi p’unchay pasayta. Chay libroqa tukuy ukhuyta thalarpariwarqa. Chay libroj tukukuynimpí imatachus ñawrisqaytaqa ni jayk’aj qonqasajchu. Chaypi nisharqa: “Kunanqa chirilla kashanki, rumi sonqotaj” nispa.

Noqaqa cheqamanta ajinapuni kasharqani. Cristiano kayta munarqani, chaypuni kasharqa yuyayniypeqa. Chaywampis, iskay sonqolla kasharqani Dioswanqa; juchallispapis mana sonqoytaqa nanachikorqanichu. Sonqoypi nikusharqani: “Qanqa Diosta wasanchanki”, nispa. Chay librota ñawisqayqa phirita ruwashawasqanta reparakorqani. Cheqamanta Diospa kamachisqan leynenqa juchasninchejta sut’ita rikuchiwanchej. Jinaqa reparakushanki imaynachus kasqaykita jinallapuni, chaywampis chayta mana reparasharqankichu” nispa. Jinaqa, noqamampis Dios rikuchishawarqa sut’ita tukuy chayta.

Kunanqa sut'ita repararqani Jesuscristoqa noqa jina runasrayku wañusqanta. Noqaqa wasanchasqani Diostaqa; chaywampis kunanqa atisqani Diospa wawan kayta, chaypajri Dios kikin wakichipuwasma chay jatun khuyayninraykulla mana chaypaj jina kashajtiy.

Puñukapushajtiyñaqa may jatun kusiyoq sonqoypi rikhurerqa, waqarqanipuni kusiymanta. Umaypi sut'i kasharqa Dios imatachus noqamanta mañawarqa junt'anaypaj, chay tukuyta Jesús junt'asqaña noqarayku. Tukuy ima noqaj yuyasqay, ruwasqay imaqa manaña imapajpis valerqachu, jinaqa uj k'uchuman saqerqani; Jesucristollapiña sonqoyta churarqani.

IMATATAJ JESUCRISTO RUWARQA QANRAYKU?

Juchasniypi chinkasqata rikuwaspa Diosqa mayta sonqonta nanachikusqanqa sonqoyta mayta wawayachiarqa. Noqataqa cheqamanta pay mask'awasqa tarinawankama; chaytari chay jatun khuyayninraykulla mana khuyanapaj jina kasjatiypis. Chaymantapacha t'ukuspa sapa p'unchay kawsakuni.

PITAJ JEUSRÍ?

Jesusqa Dios, Diospa Churin, chaywampis runapunitaj. Runamanqa tukorqa Salvajninchej kanampaj.

IMAYNATAJ KASHAN CRISTIANO KAYRÍ?

Iskay imas rikhurin runaj kawsaynimpi: T'ukuna imas rikhurin, mosoj runaman tukupuy; chantá uj maqanaku jina rikhurillantaj kawsaynimpi. Noqaj kawsayniypi yuyaspaqa atini niyta: Mana pi runapis payllamanta chay jina kawsayniyoj rikhuriyta atinmanchu Diospa Simi Nisqampa ruwasqan jinaqa.

Chaywampis llakichiwanraj, sajra yuyaykuna, sajra ruwaykuna imaqa kawsayniypi kashanrajpuni. Chay imasqa Dioswan churanakushan. Kawsayniypi chay imasqa llakichiwan. Jinapis mana q'enaqakuspa ñawpajllamampuni rishani janaj pachaman chayanaykama. Uj p'unchayqa Salvawajniy Jesusta rikusaj. Jaqaypi wiñaypaj tiyakamusaj Diospa Simi nisqanwan junt'asqata kawsakamusaj, manañataj ujtawan juchata ruwayta moq'esajñachu.

Chaykamatajri tukuy yanapayninmanta Jesusman pachi, nispa kawsakusaj. Pay tarikapuarqa chinkasqa kashajtiy yanapashawampunitaj paypi creesqay sinch'i kanampaj tukuy kawsayniypi, janaj pachapi wasiyman chayanaykama."

PAY MASK'AWARQA

Misk'i munakuywan Pay mask'awarqa

Juchaj llawch'iyachisqan onqosqataj kashajtiy
 Lijrarikuwaspa pusaykachawarqa
 Paypa waqaychaynimpi jap'iwarqa;
 Angelkuna Paypa ñawpaqempi
 Khuyayninmanta kusiywan takisharqanku.

¡may munakuywan mask'awarqa!
 ¡Manchayta ñak'arispá kacharichiwarqa!
 Chay jatun khuyaynin pusawarqa
 Noqata ruwawaj Tataypa wasinman.

IMATAJ DIOSPA MUNAYNIN KASHAN KAWSAYNIYKIPAJ?

Chay tapuyniyanqa kutichiwaj kay jinata:

Diosqa munan tukuy salvasqa kananchejta. Chayqa niyta munan: Maypichus Dios reinashan, chayman yaykuy. Tukuy salvasqa kajkuna Santo Dioswan wiñaypaj kanqanku janaj pachapi, jinallataj Jesucristowan pichus kawsayninta qorqa salvanawanchejpaj, chaywan.

1 Timoteo 2:4-6 nin: "...Payqa munan tukuy runas salvasqa kanankuta, cheqa kajtataj rejsinankuta. Uj k'ata Dios tiyan, jinallataj Dioswan runasta allinyachejpis uj k'atalla, chaytaj Cristo Jesús, Runa. Paymin kawsayninta jaywaykorqa, chaywan tukuy runasta salvanampaj. Cristoqa maychus tiempompi kawsayninta jaywaykuspa, sut'ita rikuchin Dios tukuy runasta salvayta munasqanta", nispa.

TUKUY IMAMANTA ASWAN JATUN YUYAY

Diosqa munan noqa salvasqa kanayta, munallantaj qampis salvasqa kanaykita. Uj p'unchayqa kay pachapi kawsayninchej tukukaponqa. Chay p'unchayqa tukuy imamanta astawan yachasun salvasqachus manachus kanchej chay. Mayqen ñampitaj qan kashanki? Janaj pachapi kusiyman pusaj ñampichu, chayrí, ukhu pacha infiernopi ñak'ariyman pusaj ñampichu?

Nina larway infiernoqa kampuni. Bibliaqa infiernomanta parlaspa ashkha sutista oqharin. Jesucristoqa mana munanchu pipis chay mana thasnuy atina nina larwayman rinanta. Mateo 7:13 nishan: "K'ullku punkunejta yaykuychej, imaraykuchus anchomin punkoqa, jatuntaj chinkayman pusaj ñampis", nispa.

ÑAN

Dios munan qanqa rinaykita janaj pachapi wiñay kawsayman pusaj ñannejta. Kay pachapi tukuy imata tarisunman chaypis mana chaykamachu kanman, Janaj Pachamanta jawapi wiñaypaj rikhurisunman chayqa.

Qampajpis tukuy imamanta aswan sumajqa kanman, yachanayki Janaj Pachaman rishan chay ñampi kashasqaykita, jillataj Janaj Pachapi wiñay kawsayta jap'inayki kashasqantapis.

Bibliapi, Apocalipsis libro rikuchishawanchej Janaj Pachaman ñanta. Ari, Apocalipsis 7:14-15 nin: "...Paykunaqa p'achasninkuta yurajyacherqanku, Corderoj yawarnimpi t'ajsaspa", nispa.

JESUSQA RUWARQA

Chay Corderoqa Jesucristo. Pay karqa Diospa Corderon. Jerusalén llajtapi Pay wañuchisqa karqa cruzpi clavasqa iskay waranqa (2000) watas pasaypi.

Dios Tata Jesusman q'epiricherqa, tukuy juchasniyta, qampa juchasniykita, tukuy kay pachapi kaj chhika runaspa juchasninta. Ari, Jesucristo chay jina jatun nanaypi mayta ñak'arispa wañorqa noqanchejpa cuentanchejpi.

Bibliaqa nillantaj: "Cristoqa mana ima juchatapis ruwarqachu. Diosrí noqanchejrayku Cristota castigarqa kikin juchapis kanman jinata", nispa (2Corintios 5:21). Gálatas 3:13 nillantaj: "Cristoqa preciowan kacharichiwaraqanchej leypa maldicionninmanta, imaraykuchus payqa maldecisqa karqa noqanchejrayku. Pichus kurkupi warkhusqa maldecisqa kachun, nispa". Arí, Jesusqa tukuyta juchasninchejta cruzman clavaykorqa (Colosenses 2:14). Dios Tataqa Jesusta juchacharqa Diospa kamachisqanta noqanchej p'akisqanchejmanta. Noqanchej p'akerqanchej Tata Diospa tukuy kamachisqanta. Diospa kamachisqanqa mat'iwanchej chayta junt'ananchejta, noqanchejtaj mana atinchejchu junt'ayta maychus junt'anata jinaqa.

PITAJ JANAJ PACHAMAN RENQARI?

Janaj Pachamanqa renqanku, pikunachus mayllasqa yuraj rit'ita Corderoj yawarnimpi, chaykunalla. Imaniytataj munan chayrí? Chayqa niyta munan tukuy juchasninchejmanta Dios perdonawasqanchejta. Ima ratopitaj perdonawanchej? Ima ratochus tukuy sonqo Diosman kutirikunchej, chay ratopi, juchayoj kasqanchejmanta sonqota nanachikuspa, (arrepentimiento); astawampis tukuy sonqo Jesucristopi creesqanchej ratopipacha.

Tukuy sonqo Diosman kutirikojtinchejkama, juchaqa ancha millaypuni kasqanta raparanchej. Chaymanta jawataj reparakunchej yuyayninchejqa juchaman qosqa kasqanta. Biblia chaywan rikuchin: "chinkasqa kasqanchejta rikukuy". Ari, Diospa ñawpaqempi juchasapa kasqanchejrayku, juchachanawanchejpaj jina kasqanchejta

rikuchiwanchej. Noqanchejpeqa mana imapis tarikunchu Diosman jaywananchejpaj jinaqa (Romanos 7:18).

Ajinachus chayqa, necesitanchej uj Salvajta. Chayraykutaj noqanchejpajqa mana pipis, maypi kanchu Jesucristo jinaqa. Reparanchejtaj chayraykumari Jesucristoqa wañorqa juchasninchej pampachasqa kanampaj, jinallataj mayta kusikunchej chay willaymanta: ¡Jesusqa noqanchejman sayasqa kahan Dios Tataj ñawpaqempi! Pay cuentachejpi sinch'i castigasqa karqa juchanchejmanta. Jesucristo kashan noqanchejmanta parlarej Janaj Pachapi, Dios Tataj ñawpaqempi; imaraykuchus pay kikin jaywaykukorqa wañuyman yawarninta jich'aspa juchasninchejmanta mayllasqa, llimphuchasqa kananchejpaj.

¡UYARIY!

Salvasojniykeqa kawsashan. Maypachachus uyarinchej sumaj willayta chaypachaqa (evangeliota) salvasqa kasqanchejmanta, sonqonchejman Dios churan chaypi creeyta (feta) ajinamantataj mosoj runamantaj tukuchiwanchej. Chaywantaj reparanchej Jesucristo chayta ruwasqanta noqanchejrayku, chay ruwasqantaj junt'asqata ruwan salvasqa kananchejpaj. Chayrayku Dios Tataqa nin: Walejpacha, chayllawan sonqoy junt'asqa, nispa. Jesucristo tukuy juchasninchejta pampachañña, perdonañña nisunchu. Jinaqa, Jesucristoj yawarnin tukuy juchasniykimanta llimphuchasunkiña.

Chayraykutaj Dios Tataqa walejpcha, nisunki. Noqanchej wiñaypaj wañunanchejmanta, k'ata munasqa Churinta cordero jina wañunampaj kachamorqa Paypa rikuynimpi llimphuchasqaña kananchejpaj. Tukuy juchanchej pampachasqa, imaraykuchuscruzpi Jesucristoj wañusqanwan chayta ruwarqa. Diosqa manaña ima juchatapis noqanchejpi tarinchu, imaraykuchus qhawawanchej Jesucristonejta. Diospa Simi Nisqan niwanchej: "...Diospa Churin Jesuspa yawarnintaj tukuy juchamanta pichawanchej" nispa (1Juan 1:7 b).

DIOSPA QHAWAYNIMPI LLIMPHU

Qampa kawsayniykipaj Diospa munaynenqa kashan jap'ikunayki chay perdonta. Ichapis qanqa niwaj: Yuyayniykeqa kashallampuni sajra yuyaykuna, millay imasta munaypis. Wakin kuteqa chay imasman Supay tanqawasqanta reparakuni, nispa. Chantá ichapis tapukuwaj: Imaynataj llimphu kayman juchasniymanta Diospa ñawpaqempirí? Nispa. Ari, ajinaqa ajinapuni kashan, imaraykuchus aychamanta paqarisqallaraj kashanki, uyariy Jesucristo nerqa Nicodemoman chayta: "Aychamanta necejqa aychamin, Espiritumanta nacejrí espiritumin" nispa (S. Juan 3:7). Chaywampis kunanqa Jesucristopi llimphuchasqaña kanki. Jesucristopi creesqaykirayku Dios Tata cheqan runapaj qhawasunki mana juchasapatañachu. Diospa Corderompa yawar jich'asqan llimphuchasunki tukuy juchasniykimanta.

Chayqa ajina, Dios ajanata munasqanrayku, paypa Corderon (Cristolla) yawarninta jich'asqanraykulla atin juchasniykimanta llimphuchasuytaqa. Maympachachus yuyayniykipi Supay rikhurichin Jesuspi creesqaykimanta q'enaqachisuyta chayqa, Diospa Simi Nisqampi yuyay, Salvasqa kasqaykimanta imatachus nishan, chaypi.

AJINAPUNI

Imaynatachus yuyasqaykiman jinallapuni qampi mask'anki salvasqa kasqaykita chayqa, manapuni seguroqa kayta atinkichu. Jinallataj qampi t'ukuna imas rikhurinanta salvasqapuni kasqaykimanta chayqa, qampi kusiy kashan cristiano kasqaykimanta, chaypis manaraj imapi qanmanta chinkapullanqataj. Chay imaspi yuyashanaykitaqa, astawampis yuyayniykiman churay Dios imastachus ruwasqanta, jinallataj Dios imatachus nisqanta salvasqa kasqaykimanta Diospa Simi Nisqampi; chaypi astawanqa sonqoykita churay. Diospa Simi Nisqampeqa nishan "Diospa Churinta sonqompi jap'ikojqa wiñay kawsayniyoj", nispa (Juan 5:12).

Ashkha imas qampi mana kashanchu chaypis, Jesucristo qampi kashan chayqa salvasqapuni kanki (Diospa wawampuni kanki). Dios Tatamanta mañakuy Espíritu Santo reparachisunanta juchasapa kasqaykita, chayta reparakuspataj yachanki Jesucristolla atisqanta chay juchaykimanta llimphuchasuyta. Jinallataj mañakuy Espíritu Santo yachachisunanta imatachus Jesucristo qampaj ruwapususqanta. Mañakullaytaj Espíritu Santo sonqoykiman churananta Cristopi samarikuyta, salvasqa kasqaykimanta imatachus Dios nisqanta Diospa Simi Nisqampi.

BIBLIAJ NISQAMPI SONQOYTA CHURAYMANCHU?

Biblia imatachus nin pay kikinmanta

Tukuynin Biblia Diospa yuyaychasqan

2 Timoteo 3:16

Imataj Bibliarí? Imatataj Biblia nin pay kikinmanta?

Pay kikinmanta Bibliaqa nin: Diospa Simi Nisqan kasqanta noqanchejpaj, tukuy runakunapaj.

Bibliaqa runakunaj qhelqasqan. Chaywampis 2 Pedro 1:20-21 nin: "Ñawpajta kayta yachaychej: Diosmanta Qhelqasqapi profetaspa sut'inchasqankokoqa mana paykunaj yuyayninkuman jinallachu karqa, imaraykuchus profetaspa sut'inchasqankokoqa mana jayk'ajpis runaj munayninmantachu jamorqa. Manachayqa, Espíritu Santomin Diosmanta chay imasta parlarqa runasnejta", nispa. Diospa Simi Nisqanqa, Espíritu Santoj yuyaychasqan karqa. "Diosmanta tukuy qhelqasqaqa paypa yuyaychasqan

kaspa, may sumaj kashan yachachinapaj, cheqa kajman kutirichinapaj, cheqanta kawsayta yachachinampaj ima”, (2 Timoteo 3:16). Ari, Diospa Simi Nisqanqa sumaj atiyniyoj. Pay nishan: “...Noqamanqa mana ch’usajllachu kutimonqa, manachayqa noqaj munasqayta ruwanqa; imapajchus noqa kacharqani, chayta junt’anqa”, nispa (Isaías 55:11).

Diospa Simi Nisqanqa t’ukuna imasta ruwan. Payqa yachachiwanchej, yuyayninchejta mana iskayrayajta saqenchi, Diosman chayana ñanta rikuchiwanchej; tukuy imamanta astawataj Dioswan uj sonqolla kawsakuyta yachachiwanchej.

Bibliyaqa mana mayqen libro, runaj qhelqan jinallachu. Bibliyaqa Diospa Simi Nisqan; chaytaqa kikin Bibliallataj niwanchej.

Maypachachus tapukunchej: Bibliapi atiymanchu sonqoyta churayta? Nispa chayqa, mana parlashanchejchu, mayqen runaj qhelqasqan libropi yuyaspallachu. Parlashanchejqa imatachus kikin Bibliapuni nishan Diospa Simi Nisqampuni kasqanta; chaymanta parlashanchej.

JESUCRISTO NIN

Chaymanta yachanapajqa yuyarikunanchej tiyan Jesucristo imatachus yachacherqa Bibliamanta parlaspa, chayta. Chaymanta yachachisqan qhelqasqa kashan: “Diospa munayninta ruwayta munajqa yachachisqayta rejsenqa Diosmantachus, chayrí noqallamantachus kasqanta” nispa (S. Juan 7:17).

DIOSPA SIMI NISQAN IMATACHUS NIN, CHAYMAN JINA KAWSAYNIYKITA CHURAY

Chay ajina kanampajqa qallariy Diospa Simi Nisqanta ñawispa. Chayman yachasqa kanaykipaj sapa p’unchay ñawispa, manari maynin kutillachu. Chantapis kantullamanta ñawiriy. Jinapis ama ujllapi ashkha imasmanta parlajtachu. Ñawiriy uj imamanta parlashan, chayllata; tukuy yuyayniykita chayman churaspa. Yuyayniykipi sut’i kanankama imatachus nishan chay ñawisqaykipi chaymanta. Jesús nerqa: “Diospa munayninta ruwayta munajqa yachachisqayta rejsenqa Diosmantachus, chayrí noqallamantachus kasqanta” nispa chay nisqanwanqa mana chay imamantachus parlasharqa chayllapajchu chayta nisharqa, manachayqa chay nisqanqa kasharqa tukuynin Bibliamanta parlaspa.

Chay ajinapuni kasqanta yachayta munaki chayqa, saqey Biblia yuyaychasunanta, kawsayniykita pay pusarinanta. Mana kanchu waj jinamanta chayta yachanaqa. Sichus Bibliyaj nisqanta jap’ikunki chayqa, cheqamanta yachanki ajinapuni kasqanta.

IMATAJ KASHAN CHAY “DIOSPA MUNAYNINTA RUWAY?

Diospa munayninta ruwanamanta parlashaspa chay Chunka kamachisqakunata junt'anamantapis astawanraj parlasharqa. Yuyayninchejmanqa ñawpajta jamun chay kamachisqata junt'ana kasqan. Arí, yachanchej kamachisqakunaqa yachachin Diospa munaynin imachus kasqanta; chaywan yachanchej imachus ruwana, imatajchus mana ruwana kasqanta. Chaywampis cheqamanta chay kamachisqasta junt'aytapuni munawajchu? Jinaqa junt'aj churakuy. Diosqa chay kamachisqasta qowarqanchej chayman jina kawsakunapaj.

Jesucristoqa nerqa, chay kamachisqasqa iskay kamachiyllapi junt'akusqanta. Diosta munakuna tukuy sonqo, tukuy alma, tukuy yuyaywan, tukuy kallpawan kasqanta; jinallataj runa masitapis munakunallataj kasqanta (Marcos 12:28-31).

Kallpakuy Diospa munayninman jina kawsakuyta. Chantá manaraj imapi reparakunki junt'ayta mana atisqaykita. Rikunki mana atikusqanta chayta ruwayqa.

BIBLIAQA CHEQATAPUNI NIN

Kunanqa yachankiña Bibliaqa cheqatapuni nisqanta noqanchej imaynachus kasqanchejta. Diospa Simi Nisqan rikuchisunki, yuyayniyki, sonqoyki imaqa sajra kay kashasqanta, chayraykutaj Dioswan mana allimpichu kasqaykita. Chayta yachaspaña ama yuyaychu Diosta ch'awkiyaytaqa, chay jina kashaspa may k'achapis kawaj jina Diospa ñawpaqempi kashasqaykita. Astawanqa reparay Diospa chay kamachisqasnenqa sut'ita rikuchisusqanta imaynachus kasqaykita.

Chayta umayki sut'ita jap'inki chayqa rikunki mancharina jina kasqanta, Diospa contrampi kashasqaypi rikukuspa, kawsayniykipeqa sajra imaslla aswan kashasqanta. Allin imasta ruwaytaqa munashanki mana manachoqa, chaywampis imatachus Dios mana munanchu ruwanaykita, astawampis chaytapuni ruwanki.

Chaytaj reparachisunki Diosta mana manchachikuyniyoj kasqaykita imaynachus manchachikuna kasqanta jinaqa.

Manachu yuyanki chayqa ajina kasqanta?

Reparanki chaytaj, cuentata qokunki chinkasqa kasqaykita, juchasapa kasqaykita, Diosmanta karupi kasqaykita, kamachisqasninta junt'aytataj ni imaynamanta atisqaykita junt'ayta.

KUNAN IMANANKITAJ?

Chay tapuymanqa Jesucristoj nisqan kutichin: "Diospa munayninta ruwayta munajqa yachachisqayta rejsenqa Diosmantachus, chayrí noqallamantachus kasqanta", nispa.

Diospa munaynin qampajqa kashan Jesucristoman chimpanayki imaynachus kasqayki, tukuy juchasniykiwan.

Qallarínaykipajqa, Jesusman chimpay ni imata pakaspa nitaj may kasqaykita yuyakusqaykita saquespa.

Arí, paymanqa chimpaykuy imaynachus kasqayki. Diosqa ajinata payman chimpanaykita munan.

Chayta ruwasqayki qallariypeqa ichapis llakisqaraj kanki. Sonqoykej yuyaynin (concienciayki) juchachasonqaraj. Chayraykutaj ichapis yuyankiraj Diosqa qhesachasunanta. Chay tukoyqa kashan ajina, ajinata yuyayman yachasqa kasqaykirayku.

IMACHUS ASWAN JATONQA

Jesuspa parlasqampi aswan jatumpaj qhawanaqa kashan: Payta rejsinayki, paypa nisqanta creenayki. Yuyariypuni paypa nisqanta: “Diospa munayninta ruwayta munajqa yachachisqayta rejsenqa Diosmantachus, chayrí noqallamantachus kasqanta”, nispa nin payqa. Jinaqa paypa Simi Nisqampi sonqoykita churay.

Chay parlasqampi Jesuspa “yachachiynenqa” kashan, payta rejsinayki kasqanta, salvanasumpaj imatachus ruwasqanta sut’ita yachanayki kasqanta. Chay tukuyri, imatapunitaj niyta munanri?

Chayqa niyta munashan, juchasapas kasqanchejta, manataj noqallanchejqa salvakuyta atisqanchejta. Chayraykutaj payqa noqanchej castigasqa kananchejta pay castigasqa karqa chay tukuy millay imasta, sajra imasta kawsayninchejpi ruwasqasninchejmanta. Pay q’epirikorqa tukuy juchasninchejta, may chhikapis kachun, maskha millaypis kachun, noqapis qampis chay juchasninchejmanta kacharichisqa kananchejpaj.

ALMAQA JATUN LLAKIYPI NI IMANAKUYTA ATINCHU

Ajinamin laqhayaypi rikhureyqa

Munasqa kawsaqe, cristiano masi, ajinapi rikhurispa qanqa ni imanakuyta atispa mana yachashankichu imaynatachus chaymanta llojsiyta.

¡Noqaqa mayta munayman qanwan parlaykurispa sonqochasuyta kallpasuyta ima, ñawpajllamampuni rinaykipaj! Noqapis chay jinapi rikhuriyta yachani. Diospa Simi Nisqanqa sapa ujninchejpaj kasqanta; jinallataj Diosmanta Qhelqasqaj nisqampipis sonqota churayqa mana atina jinallachu kasqantapis yachallanitaj.

Tukuy imamanta astawanqa chay kashan qampajpis aswan mana atinayki jinaqa. Qanqa ichapis mana iskarayashankichu Diospa Simi Nisqanmantaqa, nillataj Diosqa tukuy atiyniyoj kasqanmantapis. Arí, mana, imaraykuchus ashkha kutis kawsayniyki rikushallanki chay tukuy ajina kasqanta. Chayta yachasqaykipis mana yanapasuspa jinanchu kunampeqa.

Diosqa mana iskay parlayniyojchu; Diosqa imatapis, imamantapis qayna imaynatapis nerqa chayqa, chayllamantataj kunanqa mana waj jinata ninchu. Qanrí ninki, qaqa nishanki uj jinaman tukusqaykita; ñawpajta uj jina kasqaykita kunantaj waj jina kasqaykita. Manaña ujkuna cristianos jinachu kasqaykita, manachayqa chiri sonqolla kashasqaykita. Qanqa yuyashanki waj jinapuni kashasqaykita, kawasayniykeqa p'enqaylla kashasqanta; ajina kasqaykiraykutaj Cristoqa qhesachasunanta yuyashanki.

Ajinapi rukukuspaqa yuyashanki Diospa Simi Nisqampis chaytapi nishasqanta. Salmo 34:18 nishan: "Tata Diosqa qayllapi kashan salvanampaj juchallisqankumanta sonqonkuta nanachikojkunata pikunachus manaña salvasqa kayta yuyankuchu, chaykunata", nispa. Chayta ñawispapis qnqa niashankiraj: Imaynapichus atiyman juchasapa kasqaymanta llakikuyta; ichapis Diosqa aswan qayllaypi kanman, salvawanmantaj, chaywampis sonqopeqa sajra imasllapuni kashan. Mana niyta atinichu noqaqa juchasapuni kashasqayta, jinaqa mana sonqoyta nanachikunichu ajina kasqaymantaqa.

DIOSPA KAMACHISQAN LEY IMAJCHUS KASHAN

Chay ñaqa rikusqanchejman jina cristianokunaj kawsayninkupi rikuspa, yachaspa uj may uyarisqa evangelista Suecia llajtayojqa nerqa: "Diospa Leynin imajchus kasqanqa, ashkha cristianokunaj ñawisnimpaj mana rikuy atina. Chayrayku juchasninkoqa mana sonqonkuta nanachinchu Diosman kutirikuyta munanakupaj, astawanqa juchallata rikunku. Qanqa ichapis munawaj Diosman cheqamanta kutirikuytapuni, chaywampis astawanqa rikunki juchallata, juchaj atiywillanta. DIOSPA KAMACHISQAN LEYQA mana atinichu sonqochasuyta, astawanqa q'enaqachillasunki. Imaynata? Chay leypeqa nisunki: Kayta ruway, kay ujtataj ama ruwaychu, nispa. Qantaj manapuni junt'ankichu, chaytaj jucha, imaraykuchus Diosta mana kasoyqa jucha. Charaykutaj q'enaqakunki astawan, astawan. Arí, arí, Diospa Kamachisqan Leyqa chaypajpuni. Ajinapi rikhurinki chaytaj, ñapis qallarinkiña Diosman k'umuykuyta sonqoyki thañinampaj, sonqochasqa kanaykipaj.

"Chaywampis, juchasapa kasqaykita reparakuspa, juchasniykita Diosman willakusqaykirayku sonqochasqa kayta yuyanki chayqa, Diospa Leynenqa manaraj imatapis ruwashanchu kawsayniypi. Diospa kamachisqan Leyqa mancharichinasumpaj, kharkatitichinapajpuni kahan; ajinamanta qampa cuentaykipi Jesucristoj wañusqan sonqochanasumpaj.

"Diospa khuyaynimpipis chay sonqochasqa kayta mask'aspapis manapuni tariwajchu sonqochasqa kaytaqa. Sonqochasqa kayqa tarikun, Jesucristo cruzpi qanrayku wañusqallampi", nispa nin Carl Olof Rosenius.

CHEQA SONQOCHAYCHU CHAYRI RIJCH'AKULLANCHU?

“Noqallamanta kashan imaynachus kawsayniy kananqa”, nispa yuyasqaykitapis Dioslla atin chinkachiyta qanmanta; qanqa ni chayllatapis atiwajchu ruwayta. Chay imasqa qanmanta atin chikachisqa kayta pisimanta pisi tukuy kawsayniyki. Uj p’unchayqa reparakunayki tiyan Diostaqa mana munakushasqaykita, imaynachus munakunata jinaqa.

Mashkha kutis nerqanki: Chay juchataqa mana ujtawan ruwasajchu, nispa, chaywampis yanqhalla icharí?, ujtawampis ruwallankitaj. Diosmantapis mañakunki kallpata chay juchata saqeyta yanapasunanta, jinapis kunankama mana saqeyta atinkichu.

Manachu kallpallaykiwan yuyashanki ima juchatapis atipayta, manataj Diospa atiyinwanchu? Reparakuy imaynatachus Diosmanta mañakushanki chayta. Sichus yuyashallankipuni juchata atipanaqa qanllamanta kashasqanta chayqa, tiempollaykita usuchishanki. Ajinallatapunchus yuyashanki chayqa, yanqhalla kashan Diosmanta mañakusqaykipis; sonqo tiyaykuytaqa ni jayk’aj tarinkichu.

CREESQAYKI TINKUPI KASHAN, CHAY CREESQAYKITAJ JARK’AKUNA ESCUDO

Apóstol Pablo uj cartata Efeso llajtapi tiyako cristianosman apachisqampi uj nisqan noqata jatunta yanapawan juchaman urmanapaj tanqasqa kashajtiy. Efesios 6:16 nin: “Astawanqa tukuy sonqo creeychej, imaraykuchus chay creesqaykichejqqa uj jark’akuna escudo jina, Kuraj Supaypa tukuyin larwashaj flechasninta thasnonqa”, nispa.

Mana creesqallanchejwanchu Supayman sayaykuna kashan, manachayqa chay creesqaykita escudota jina jap’irisqa. Imapunitaj kashan chayrí? Chayqa kashan: Salvawajninchej Jesucristo.

Jesucristomanta willay, chay sumaj willay, juchasninchejmanta pagasqaña kasqan; cruzpi wañushaspa yawarninta jich’asqanwan mayllasqaña kasqanchej. Chay kanan kashan yuyayniyki, sonqoyki chay jark’akuna escudoqa. Chaymin atenqa thasnuyta Supaypa larwashaj flechasnintaqa.

Juchaman urmanaykipaj jinapi kashaspaqa atinki Jesucristoman: Pachi, niyta atinki paypis ajinata Supayta atiparqa, imaraykuchus kunampi qantapis juchaman urmanaykipaj kunan tanqashasunki. Evangelioy yuyayniykita, sonqoykita ima churay Supay ajinata tanqashasojtin. Chantá rikunki imaynatachus Supay ayqesqanta qayllaykimanta.

IMARAYKUTAJ NOQAMAN CHAYAMUWAN?

Onqoykuna, ñak’ariykuna noqanchejta chay jinaman chayachiyta atiwanchej. Reparayninchejmantaqa Diospis noqanchejmanta saqerpariwasunman jina, karunchakunman jina. Diosmanta mañakojtinchejpis manapis uyariwasunmanchu jina.

May chhikatapis Diosmanta mañakushay chay tukuymanta libranasumpaj, kkillampunitaj kashasqaykeqa q'enaqakapunaykipaj jina, ichari? Mana kaspá jinanchu qanmanta chay tukuy imas chinkarinanqa.

Mashkha kutista Diosman qhaparikunku, imaraykutaj Tatáy, imaraykutaj chay imas noqaman chayamuwan? Noqaqa ujkunamanta aswan juchasapachu kani, ajinapi saqenawaykipaj? Kay chhikata qhaparikamushajtiy, imaraykutaj mana yapariwankichuri? Nispa.

Chay tapukuyniykimanqa qnallataj kutichikunayki kashan: Dios saqen chay imakuna noqapi kananta, nispa. Aaaaachay tukuyta sumaj sut'ita umaykipi chayqa, manaña Diosmantaqa mañakushankichu chay tukuy imasta qanmanta chinkachinanta.

Ari, cheqamanta pichus qan jinallataj ñak'arejlla yachan imaynachus chay kaspá creesqampi sin'ita sayana kasqanta.

IMAYNAMANTATAJ JESUSTA CHINKACHIYMAN?

(DIOSQA SAQERPARIWANMANCHU?)

Diosqa mana saqerparisunkichu, ajinaman rijch'asunki chaypis. Ama chhikata chaymanta phutikuychu pantasqata yuyasqaykirayku. Diosqa astawampis astawan astawan munan paypi sonqoykita churanaykita qampa yuyasqaykej patampi. Yuyaniyki ajinasta jap'isqaykirayku Dios saqen imaymana phutiykunapi rikhurinaykita.

Diosqa chay phutiykunawan qanta atin wakichiyta imatachá munashan ruwanaykita, chaypaj. Manka llut'aqa uj wakichisqa t'urullamanta imaymanasta ruwan pay imaynatachus munan kananta, ajinata. Kikillantataj Diosqa wawasninwan ruwan. Arí, Diospa khuyaynenqa ajinata kawsayninchejpi ruwan.

Jesuspatauni kasqaykimanta sumaj sut'i señal kashan chay mana segurochu kashasqayki, reparakushankitaj Jesusmanta karupi kashasqaykita yuyasqayki. Qanqa munashankipuni Paypa ñawpaqempi kayta, mana manachoqa. Chaywampis manapuni sonqoyki tiyaykunchu, kikin Cristo sonqoykita tiyaykuchinankama.

Chay tukuy imas rikuchishasunki Jesucristota munakusqaykita; imaraykuchus pitachus mana munakunchejchu chayqa, paymanta mana dakuwanchejchu.

Tukuy chay imas sonqoykita pataman oqharisuchun chay llakiyniykimanta.

SALVAWAJNINCHEJQA MANA KUNALLAMPICHU YUYASHAN, MANACHAYQA ASWAN ÑAWPAJPI

Diosqa sumajta yachan imachus aswan ñawpajpi kasqanta. Payqa noqanchejmanta chinkachenqa kunampi tukuy phutiyninchejta. Chantapis payqa yachan ima phutiytapis, ima ñak'ariytapis maykamachus awantayta atinanchejta. Chayraykutaj

umanchejpi sumajta jap'isun, Diosqa chaykamalla saqewanchej ñak'arejta, chaymantataj usqhayllata yanapaykuwanchej (1ª Corintios 10:13).

Qanqa ama phutikuyñachu, astawampis Diospa makinman churakuy, Pay waqaychasonqa. Dios munampunitaj ajinapi kanaykita chaytajri, mana qanmanta chinkachenqachu chay phitukuyniykita, Payqa ajinamanta janaj pachaman rej ñampi jap'isonqa, jaqayman chayanaykikama. Jinallataj umaykipi jap'inayki tiyan imatachus 2ª Corintios 12:9 nishan chayta. Uj p'unchay, chaymanta: Pachi ninki Diosman.

Chaywampis qanwampuni kani.

Paña makiymanta jap'iwanki.

Yuyaychawasqaykiwan ñanta pusawanki.

Chaymanta qhepatataj chhika patapi jap'ikapuwanki.

Piniytaj Janaj pachapi kapuwanrí?

Qanlla

Qanwan kaspaga,

kay pachapi ni imatawan munanichu.

Salmo 73:23-25